

**«LANGUAGES MEET SPORT – FESTIVAL DES LENGHIS  
REGIONÂLS E MINORITARIIS» A UDIN AI 19 E AI 20 DI OTUBAR**

# Il sport al jude lis lenghis

**Studi des lenghis e ativitât sportive  
e motorie si incuintrin tun projet  
european par stiçâ students e insegnants**

**L**U DISIN LIS SIENCIS de educazion. Il leam jenfri a-  
tivistât fisiche e disvilup des lenghis no si pues  
dineâ. Sierade un an za fa «Languages meet  
sport 2», cunvigne davuelte a Triest e dedicate  
al rapuart fra i doi elements (ma che al cjapave  
in considerazion i grancj idiomis che si fevelin  
in Europe) ve pronte la numar trê: «Languages  
meet Sport – Festival for Regional and Minori-  
ty Languages and Cultures», in program a U-  
din ai 19 e ai 20 di Otubar, li dal Centri culturâl  
Beade Vergjine des Graciis. Si trate di un  
projet sostignût de Union europeane (Life-  
long learning program), organizât de agenzie  
«Leader comunicare interculture», in colabo-  
razion cu la Agenzie regional pe lenghe furla-  
ne. Dutis lis ultimis dretis su [www.language-  
smeetsport.eu](http://www.language-<br/>smeetsport.eu)

«Daspò ce che o vin viodût te edizion prece-  
dente, si sin domandâs: parcè no trasferî i ri-  
sultâts otignûts aes lenghis regionâls? E cuant  
che lu vin proponût a Bruxelles, o vin vût subit  
sucès, cjapant i ponts plui alts, parcè che il  
mosaic european al è fat di tantis piçulis len-  
ghis, che a son però primis, marilenghis, par  
chei teritoris dulà che si fevelin», e spiegher la

coordenadore Ariella Cuk.

La manifestazion, duncje, e coventarà par  
meti in lûs lis «best practice» in fats di mino-  
rancis, dant la oportunitât a chês organiza-  
zions che a àn un fuart colegament cul teritori  
di presentâ i lôr projets, fevelâ fra di lôr, e svi-  
lupâ une rêt di rapuarts e contats. «Si trate di  
un percors inovatîf – e continue Cuk – sul plan  
metodologic e culturâl, parcè che di une ban-  
de si coniughe la vision europeane cun chês ter-  
ritoriâl, di chês altre si fâs incuintrâ il studi des  
lenghis regionâls e minoritariis cu lis ativitâts  
sportivis e motoris, dal balon al rugby, dal svol  
al rap. Al sarà un mût par cjatâ elements in co-  
mun e diferencis». Par chest motîf, al sarà tirât  
dentri soledut il mont de scuele. La dirigente  
scolastiche regional, Daniela Beltrame, e à za  
sparniçât il messaç ai istitûts di secont grât de  
regjon, domandant plene visibilitât e invitant  
ae partecipazion students e docents di educa-  
zion fisiche e di lenghis.

La doi dîs di studi e sarà smiezade in doi  
moments: relazions e sessions plenariis (plui a  
nivel tecnic e teoric) e workshop (plui inte-  
ratîfs e particolarmentri davuelts ai zovins).  
Jenfri i apontaments che si puedin scori tal  
program preliminar, a Udin a rivaran i cicliscj  
Euskadi (minorance basche), che a partecipin  
a Tour de France e Vuelta, il svol libar in SüdTi-  
rol, lis disciplinis sportivis di frisons, galês, slo-  
vens, irlandês, ladins. Il cjant, il bal, il rap che



al unis. Parone di cjase la lenghe furlane. Tra lis esperiencis contadis, chè dal Udin – intindude come squadre di balon – e il so leam cul teritori. E dongje, l'Arsenal Double Club cul so model di aprediment des lenghis, aes 11 di matine di vinars ai 19 di Otubar. E tal dopodimisdì, aes 4, Federica Angeli e Priscilla De Agostini, espertis di furlan, a puartaran il lôr libri, «Gol. Viaç traviers il sport e lis lenghis minoritariis europeanis». La dì dopo, e vierzarà la cunvigne, il diretôr de Arlef, William Cisilino, fevlant di «Imprescj e azions par sostignî la socializazion de identitât: il câs de lenghe furlane».

Trê, invece, i workshop dulà che i students a

podaran sperimentâ la crosere di lenghis, moviment e sport. Par une ore e mieze, di misdì ae une e mieze di vinars e des 11 e mieze ae une di sabide, a saran inmaneâts trê moments di «laboratori interatîf». Un dedicât al bal Haka dance Maori, tal contest dal rugby, un al spirt multilinguistic de «Olympic song» (Ream Unît) e po une sperimentazion musicâl su la fonde dal «Rap Camp», une des modalitât che il finlandês al ven insegnât in Svezie. Culi – nus è stât anticipât – i students a assisteran a improvisazions e melodiis raps che a dopraran chest ultin idioma, l'inglês e il furlan, cu la partecipazion straordinarie dal nestri dj Tubet.

**OSCAR PUNTEL**